

Minister Dangui Oduber en conexion cu AruBIG:

‘Lo institui instituto di calidad cu lo determina calidad di cuidu na Aruba’



ORANJESTAD - Aruba no tin un registro oficial unda cu por registra nos mediconan cu ta studia den region na e momento aki. Tur studiante, cu a studia por ehempel na Colombia, Costa Rica y Merca, mester registra den e sistema di BIG di

Hulanda.

Segun comunicado, minister Oduber a institui un comision pa sondea tur e posibilidadnan cu tin. E comision aki ya tabata ocupa pa algo mas cu 7 luna pa asina yega na e miho solucion pa por reconoce tur persona cu ta biba na

Aruba, a nace na Aruba y a/ta studia den region. Tin un consenso den e comision y a trece un proposicion riba mesa.

E mandatario a menciona cu e ta lamenta si cu e ex director di AZV, Anko Ringeling despues di tabata sinta na mesa durante henter e proceso, na momento cu ya el a stop cu su funcion a duna un declaracion, treciendo bruhacion of insinuacion cu e comision ainda lo ta den discusion y cu na niun momento a yega na un consenso. “En todo caso mi ta contento cu e director nobo ta di acuerdo y ta sostene e proposicion cu tin riba mesa, solamente cu como AZV nan tin algun pregunta y como gobierno, nos

ta habri pa contesta tur e preguntanan ey”, minister Dangui Oduber a declara durante conferencia di prensa.

E minister ta compronde cu lo por tin resistencia of preocupacion di parti di algun medico especialista, kendenan ta teme cu e calidad di cuidu por ser afecta. Minister Dangui Oduber: “Na momento cu a institui e comision, nos a bisa hopi cla cu e punto di salida ta cu importante den henter e proceso aki ta pa por mantene un calidad di cuidu hopi halto.”

Desde inicio di gobernacion, minister Dangui Oduber, encarga cu e cartera di salud a duna di conoce cu e kier trece cambio den e situacion aki,

dunando asina e oportunidad husto cu yiunan di tera merece despues di a termina nan estudio pa ta medico. Cu esaki a inicia e proceso pa bin cu AruBIG.

Parti di e proceso di AruBIG ta cu lo institui un institucion di calidad di cuidu (kwaliteit-sinstituut), cual su funcion ta pa determina kico ta e calidad di cuidu cu nos como pais ta haya aceptabel. Minister Dangui Oduber ta pone enfasis riba cu na niun momento e intencion ta pa crea e discusion riba e calidad di cuidu cu nos pashentnan mester haya, door di duna e oportunidad na nos mesun yiunan di tera cu a studia den region pa bin traha na Aruba.